

Goibekokale

ELGETA / Barikua / 2005eko abenduaren 16a / 250. zenbakia

KOORDINATZAILEA: Irati Agirreazaldegi • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: goibekokale@goiena.com • Lege gordailua: SS475/95

Gaztetxoendako asteburuetarako aisialdi lokala zabalduko dute urtarrilean


IRATI AGIRREAZALDEGI

Udalak urtarrilean zabalduko du 11 eta 16 urte bitarteko gaztetxoendako asteburuetarako aisialdi lokala. Hantxe aisialdiko ekintzak egin ahal izango dituzte neska-mutilek arratsaldeetan, begirale baten gidaritzapean.

Udaleko hainbat ordezkari herriko gaztetxoekin elkartu, eta eurendako lokala ipintzeko duten asmoaren berri azaldu diete.

Udala horrelako lokal bat gertatzeko lanetan ari zela esan digu Izaskun Larreak. Gainera, herriko hainbat gurasok Kultura, Euskara, Gazteria, Hezkuntza eta Turismo batzordean eskaria egin zuen. Beraz, eskaera horri eta gaztetxoaren beharrei erantzunez, erabaki dute lokala datorren urtarrilean zabaltea.

Elgetan 11 eta 16 urte bitarteko 30 neska-mutil inguru daude, eta neguko asteburuetan, arratsaldeetan, euren aisialdirako gune baten beharra zeukaten. Izaskun Larrearen esanetan, "bada adin tarte bat non neska-mutilak kalean geratzen diren.



Seguru asko eliza ostean, lehengo tabako dendan, ipiniko dute 11 eta 16 urte bitartekoendako lokala.

Gurasoengandik aldendu nahi dute, baina gaztetxera edo tabernetara joateko gaztetxoak dira oraindik; eta haiek ere merezi dute euren aukera".

BEGIRALEAREKIN

Lokal horretan mahai jokoak, mahai futbola, telebista... egongo dira, eta euren ekintzak antolatzeko aukera ere izango dute gaz-

tetxoek; betiere, begirale baten gidaritzapean. "Oraindik abian ipini arte ez dakigu antolamendua nolakoa izango den. Adin askotariko gazteak daudenez,

Gaztetxoaren asmoa da aisialdian kalean egiten dutena egitea, baina epeletan

zalantzak sortu dira elkarrekin nola moldatuko diren; baina hori begiralearekin adostuko dute; betiere, ordutegia eta elkar errespetatuz".

Gazteen asmoa da "lagunekin egotea, eta kalean egiten duguna egitea, baina epeletan".

ASTEBURUETAN, ARRATSALDEETAN

Lokala herriaren erdialdean ipiniko dute, seguru aski eliza ostean, lehen tabako denda zegoen lekuan. "Lokalaren banaketa oraindik zehazteke dago, baina horrek ere baldintza dezake adinen arabera bereizketa", Larrearen esanetan.

Urtarriletik maiatzera bitartean egongo da zabalik, zapatu eta domeka arratsaldeetan, 16:00etatik 22:00etara bitartean.

HERRITARREN HITZA / Igor Arizmendiarieta • Irakaslea

"Argirik gabe"

Gabon giroan sartzera goazen garai honetan, gauza batek eman dit atentzioa azken urte hauetan. Jai giro honetan lehenbailehen murgildu asmoz, edonon eta oso goiztiar ikus ditzakegu herri eta hirietako kaleak Gabonetako koloretako argiz apaindurik. Urtetik urtera gure karraketan argi hauek denboran azkarrago eskegi eta beranduago kentzen dituzteneko ustea dut. Aspaldidanik Gabonen etorreraren mezulari, Gabonen etorrera aste asko aurretik iragartzen digute egun. Ez da arraroa azaroaren erdialdetik aurrera,

leku askotan argi hauek piztuta ikustea. Kontuan izanda Gabonak abenduaren 22an hasten direla (edo pixka bat lehenago), alperrekoa ikusten dut argien erabilera goiztiar hau. Lekuz kanpo harrapatzen naute ni neu behintzat. Bat-batean argiak ikusten ditut edonon, eta esaten diot neure buruari: hilabete eta erdi falta da eta Gabonetarako!



"Gabonetako argiek lekuz kanpo harrapatzen naute ni neu behintzat"

Argi hauen erabilera logikoagoa egin beharko genuke, lukete Udalek edo dagokienez. Argiak denboran beranduago piztu daitezke, gauetan ordu jakin batetik aurrera itzaliz. Bide batez energia eta ekonomia gastu handi bat ekidinez. Badakit argi hauek marketing-a direla eta erosketetan eragin handia dutela, baina honek ez du kentzen erabilpen egokiagoa egitea.

Betidanik izan dut amets bat, gustura proposatuko nuke Euskal Herrian Gabon oso batzuk Gabonetako argia gabe pasa, eta bertara bideratuko genukeen gastu guztia beste premiazko zeregin batzuetara bideratzea, bide batez energia kontsumoa gutxituz. Hau posible izango ez balitz, aste bat argirik gabe pasatzea ere onartuko nuke, edo kasurik txarrean egun bat argitape-nik gabe, berdin zait. Baina gauzak asko aldatzen ez badira, hurrengo urteetan gai honetan "argirik gabe" jarraituko dugula uste dut.

LABUR

Espaloiak bertso porra antolatu du finalaren aitzakian

Abenduaren 18an jokatu du Euskal Herriko Bertsolari Txapelketa Nagusiko finala: Egaña, Lujanbio, Iturriaga, Arzallus, Maia, Mendiluze, Elortza eta Colina izango dira hantxe. Eta finalaren aitzakian Espaloiak porra antolatu du. Asmatu beharko da finaleko sailkapena, eta gehien gerturatu denak edo denak asmatzen dituenak bi lagunendako afarria irabaziko du. Parte hartzeko, abenduaren 17ko 14:00ak bitarteko epea dago.

